

Contrario na pensamiento cu ta Gobierno di Aruba lo ta encarga

Ta fundacion 18 di maart tin e 'vlam eterno' di e monumento na su encargo

ORANJESTAD – E anuncio cu Aruba ta haya su prome monumento cu un 'vlam eterno' ta creando reaccion na Aruba. Esaki debi cu hopi ta cuestiona con bin un gobierno cu ta profila su mes como un gobierno tipo 'green energy' ta bin netamente cu algo cu ta contradeci esaki.

Di otro banda, BONDIA ARUBA a compronde di parti di gobierno, cu no ta trata di gobierno sino fundacion 18 di maart cu tin esaki na su encargo.

Investigacion cu BONDIA ARUBA a bai haci ta indica cu ta e fundacion aki ta esun responsabel pa tanto e evento, como e implementacion di e 'vlam eterno' unda cu e meta ta pa for di e siman aki sende un vlam cu no ta paga 'nunca mas' estilo cu tin na e graf di

entre otro presidente John F Kennedy. Un vlam cu su termino ta un poco tendencioso ya cu e por y ta wordo paga na cierto momentonan y pa cierto ocasionnan.

E reaccion di e vlam aki ta entre otro ta pakico ta na e monumento aki ta pone e vlam y no na p.e. e busto di Betico Croes riba Plaza Libertador, ya cu ta netamente Betico Croes q.e.p.d. ta esun cu ta wordo considera oficialmente como e libertador di nos isla. BONDIA ARUBA a wordo bisa di parti di gobierno, cu no ta nan a bin cu e idea, y cu si fundacion Betico Croes tambe kier bin cu un vlam eterno, ta nan pleno derecho pa haci tal. Pa por a ubica e 'vlam eterno' aki, mester a haci un trabou specifico na e sitio unda cu mester a entre otro pasa

pipanan di gas, pa asina alimenta e vlam pa e por keda sende 'eternamente'. Ta uza e mesun concepto di e graf di John F Kennedy unda cu pa medio di gas, ta mantene e vlam aki sendi. Si e paga mes, facilmente e por wordo sendi. E otro pregunta cu a surgi, ta ken ta bai carga gastonan di e gas aki y BONDIA ARUBA a bin compronde cu ta e propio fundacion 18 di Maart lo ta esun responsabel pa e gastonan di e gas cu mester tene e vlam aki sendi 'eternamente'. E evento di sendemento di e vlam aki, lo tuma lugar dia 17 di maart proximo den oranan laat di atardi, unda cu kier duna honor y respet na e mas di 2000 ciudadanonan cu a firma hopi aña pasa pa cuminsa e proceso di status aparte di Aruba.